

刀杖品第十八 十有四章

刀杖品者。教習慈仁無行刀杖賊害眾生。

一切皆懼死 莫不畏杖痛

恕己可為譬 勿殺勿行杖

能常安群生 不加諸楚毒

現世不逢害 後世長安隱

不當麤言 言當畏報 惡往禍來

刀杖歸軀 出言以善 如叩鐘磬

身無論議 度世則易 歐杖良善

妄讒無罪 其殃十倍 災迅無赦

生受酷痛 形體毀折 自然惱病

失意恍惚 人所誣咎 或縣官厄

財產耗盡 親戚離別 舍宅所有

災火焚燒 死入地獄 如是為十

雖保剪髮 長服草衣 沐浴踞石

奈癡結何 不伐殺燒 亦不求勝

人愛天下 所適無怨 世黨有人

能知慚愧 是名誘進 如策良馬

如策善馬 進道能遠 人有信戒

定意精進 受道慧成 便滅眾苦

自嚴以修法 滅損受淨行

杖不加群生 是沙門道人

無害於天下 終身不遇害

常慈於一切 孰能與為怨